

Daeglij ngamq okbae mbouj geijlai nanz, Bohgiuj couh heuh Mehmauz daeuj, dawz faenh baujyenj habdoengz hawj de, daengq naeuz: “Gou miz di saeh yaek okdou bae geij ngoenz, caznaeuz geij ngoenz dem caengz dauq ranz, mwngz couh dawz faenh caizliuh neix hawj Dahgiuj, gij yozfei bae dayoz haenx couh youq ndaw caizliuh neix caez lo.” “Gij caizliuh neix dwg maz, ndaw miz hauhneix lai ngaenz?” Mehmauz cam. Bohgiuj naeuz: “Daengz mwhhaenx mwngz gyau hawj Dahgiuj, hawj de bae ra Daeglij aeu ngaenz couh baenz, hauhneix, gou bae gonq lo.” Gangj liux couh byaij ok dou bae lo. De menh byaij menh dauqyawj aen ranz swgheij, youh gveng coenz vah ndeu hawj Mehmauz: “Mwngz caeuq Dahgiuj naeuz, itdingh hawj de roengzrengz doegsaw, de banneix majhung lo, roxsoq lo, ranz miz saeh maz hix rox dajleix lo.” Mehmauz dingqnyi gij vah neix couh riu hwnjdaeuj, naeuz: “Ok baez dou ndeu gangj baenzlai vah bae, lumjbaenz mbouj dauqdaeuj nei, cuengqsim.”

Bohgiuj okdou bae mbouj geijlai nanz, Daeglij couh muengzfwdfwd buet dauq daengz dou ranz Bohgiuj, “dung dung dung” dwk roq aen bakdou. Mehmauz dingqnyi couh byaij daeuj, naeuz Bohgiuj gaenq okdou bae banhsaeh, miz saeh maz couh caeuq de gangj gonq. Daeglij naeuz de haxbaenh youq ranz Bohgiuj ciem habdoengz, banh liux Bohgiuj gikdoengh lai de dingj mbouj ndaej couh okbae, byawz rox lumz aen

Daxboh Caemlwdlwd

沉默的父亲

□ Veiz Yinyiz / 韦运益

baugunghvwnz youq ranz Bohgiuj lo. Mehmauz swnhbienh couh dawz ok gij caizliuh Bohgiuj hawj Daeglij yawj, lij naeuz: “Haxbaenh Bohgiuj hawj gij neix hawj gou, de naeuz danghnaeuz gvaq geij ngoenz dem de caengz dauq couh hawj Dahgiuj aeu gij caizliuh neix bae caeuq mwngz lingx ngaenz, mwngz banneix youq gizneix, bang gou yawj neix dwg maz?” Daeglij cieq gij caizliuh daeuj yawj, dwg habdoengz baujyenj ha! Ngamqngamq gyau ngaenz, baenzlawz ndaej lingx vaiq lai? Couh cam Mehmauz naeuz dauqdaeuj ok maz saeh. Mehmauz hix mbouj rox baenzlawz gangj, couh lwnh gij vah Bohgiuj haxbaenh caeuq de gangj haenx hawj Daeglij nyi caez. Daeglij dingqnyi liux, naemj yaep ndeu, fwt couh diuq hwnj heuhnaeuz: “Liux lo liux lo, yaek ok saeh hung lo, vaiq, vaiq, heuh Bohgiuj dauqdaeuj!” Mehmauz yienznaeuz mbouj rox yaek ok maz saeh, hoeng raen Daeglij vueng baenzneix bae, hix ndang saenz caez, de naeuz de hix mbouj rox Bohgiuj bae gizlawz, cij rox vix baih gyaeujmbanj, naeuz Bohgiuj couh swnh aen yiengq haenx byaij bae. Daeglij lumj deng feiz byaeu laenghaex nei, muengzfwdfwd coh

gyaeuj mbanj buet bae lo.

Daeglij buet daengz henz goengloh gyaeuj mbanj, cingq raen Bohgiuj ndoj youq laeng gofaex hung ndeu, seizhaenx miz aen ci ndeu cingq hai gvaqdaeuj. Daeglij cung daeuj daengz sikhaek umj Bohgiuj maenhmaenh bae, heuhnaeuz: “Guh neix mbouj baenz bw, guh neix mbouj baenz bw!” Bohgiuj siengj cak okbae, hoeng Daeglij dailix mbouj cuengq. Gvaq yaep ndeu, gyoengqvunz mbanjranz daeuj daengz lo, Daeglij naeuz Bohgiuj siengj bae daemj ci.

Gvaqlaeng, gyoengqvunz cij rox, Bohgiuj siengj hawj ci daemj dai bae, yienzhaeuh hawj Dahgiuj bae aeu ngaenz yivai baujyenjginh, yienghneix couh gaeuq de bae doeg dayoz lo.

Yenzlaiz, Bohgiuj daj bae yinzhangz rox miz yiengh baujyenj neix liux, couh menhmenh naemj lo, de rox dahlwg de gauj ndaej dayoz, yozfei yienzbonj couh lai, daengz mwh bizyez okdaeuj ra hong guh youh yaek yungh haujlai ngaenz dem, de naemj bae naemj dauq, roxdaengz cij gauq de boux vunz ndeu youq ranz guh hongnaz, yienghlawz cungj canh mbouj ndaej haujlai ngaenz. Simsoz cawx faenh baujyenj neix, aenvih

faenh baujyenj neix danghnaeuz ok yivai deng dai, baujyenj gunghswh couh ok 15 fanh ngaenz boiz.

Rox gij saeh neix liux, Daeglij gaem fajfwngz Bohgiuj naeuz: “Au-giuj ha, gungz maz cungj gungz mbouj daengz aeu mingh bae vuenh ngaenz ha, mwngz guh neix mbouj doiq bw, caznaeuz baujyenj gunghswh caz rox, caemh mbouj ndaej ngaenz bw! Dahgiuj gauj ndaej dayoz, mbanj raeuz vunz bouboux haenh caez, caen miz maz hojnanz, vunzlai doengz daeuj bang, mwngz guh yienghneix, Dahgiuj rox liux hix ciuhvunz sim mbouj net nw!” Gyoengqvunz mbanjranz cungj doengzcaez daeuj naeuz Bohgiuj, Bohgiuj cungjsuenq caem roengzdaeuj lo.

Daeglij dauq bae daengz yinzhangz, lwnh gij saeh neix hawj gyoengq doengzsaeh nyi, gyoengqde bouboux deng gij saeh boh vih hawj lwg hwnj dayoz nyienh bae dai gamjdoengh caez. Laeng aen yinzhangz Daeglij gietdingh, hawj Dahgiuj daigvanj ngaenz bae doegsaw, mbouj sou leihsik.

Ngoenz Dahgiuj bae yozyau haenx, haujlai vunz mbanjranz daeuj soengq de hwnj hojceh. Gyoengq vunz haenx haujlai boux mbouj roxnaj cihsaw, daengz hojceh cam gizlawz dwg giz niemh biuq, gizlawz dwg giz hwnj ci cungj mbouj rox, hoeng, gyoengqde maqmuengh cihsiz, cungj saenq aen dauhleix daj ciuhgeq daengz ciuhneix mbouj loek ndeu: Cij miz cihsiz, rox gajbienq minghhoen.

(sat)



Ahnez dwg bouxvunz Mbanjmbwk, bineix 38 bi. Gwnz ndang Ahnez ciengz daiq miz fouq ginhgiz he, baez ndaejhoengq de couh iu doih youq gyang mbanj dwkgeiz. Ndigah, gyoengqvunz heuh de guh ginhgiz duicangj. Ahnez dwkgeiz gig ak, ciengzseiz ndaej hingz.

Ndaw mbanj miz cibgeij bousai, ndawde cibgeij bi daengz 50 lai bi cungj miz. Gyoengqde lwg mbouj maex, ok haex dauq youh gwn, ciengz caeuq Ahnez dwkgeiz, roxnaeuz iu Ahnez bae dienbbya diemjgoep gwn siuyeh.

Bineix ndwensam miz ngoenz he, Ahnez sawqmwh bungz raen Augit. Augit ngamq duiyuh dauq ranzmbanj ndaej geij ngoenz. Ahnez iu Augit dwkgeiz. Augit hix dwg boux geizyinx he, couh caeuq Ahnez youq gwnzdieg dwk ginhgiz. Dwk song mbat le, mbouj faen saw hingz, caen dwg ak doiq ak. Mbat daihsam, gyoengq saimbwk daeuj le, raen Ahnez saw lo, cungj swenj hwnjdaeuj: “Hu! Duicangj saw lo!” Ahnez naj nding naeuz: “Swenj gijmaz, mbouj miz boux saw baenzlawz miz boux hingz daeuj? Sou ak lai daengz sou daeuj dwk.”

Gvaqlaeng, vihliux lai ndei dwkgeiz, Augit doiq Ahnez naeuz: “Youq gwnzdieg mbouj ndei dwkgeiz, dawz daizeij okdaeuj youh mbouj fuengbienh, raeuz caep song aen daizgeiz ndei lwi? ” Ahnez angq naeuz: “Ndei, ranz gou miz cien, sa, suijniz. Mwngz cawx song gaiq cienmeng dauq couh ndaej lo.” Doeklaeng, song boux de youq laj gofaex henz giuzcangz caep ndaej song aen daizgeiz. Guh baenz le, Augit aeu camx bae siuq loh sienq ginhgiz geizciengh, lij aeu bit youzndaeu veh ndei. Yienghneix, fwn conx mbouj bae lo. Augit lij bae hamz ndaej song aen daizdiet daemq dauq guh daizgeiz, youh cawx 8 fouq Ginhgiz, 2 fouq geizciengh caeuq geij aen giuz dauq. Hawj geij boux daegcoz boux dawz fouq geiz caeuq aen giuz ndeu. Gyoengqde gig angq, baez ndaejhoengq couh bae geij aen daiz haenx dwkgeiz. Ndit ndat roxnaeuz doek fwn, couh aeu daizdiet laj daizgeiz bae dwk. Augit caeuq Ahnez ciengz doxiu daeuj dwkgeiz. Mizseiz, Mbouj miz vunz youq henz, Augit doiq Ahnez naeuz: “Vunzwnq gangj mwngz baenzlawz dwk, mwngz gaej saenq bw, cungj saenq vunz gangj mwngz couh saw, byaij yamq loh ndeu aeu ngeix sam ngeix seiq gonq……” Ahnez naeuz: “Deng, baezlaeng gou mbouj saenq gyoengqde luenh gangj lo.” Augit caeuq boux ndeu dwkgeiz seiz, de cungj daj gak fuengmienh daeuj daezsingj gyoengqde aeu haeujsim gijmaz. Gyoengq daegsai gig maij caeuq Augit dwkgeiz. Aenvih Augit miz ien ndei coemh, gig ndei gangj, daeng nyiuz vunz de couh nyiuz, hingz mbouj baeh vunz, saw mbouj fatheiq, youh rox gangj vahriu.

Seizhah, sou miuz lo. Miz ngoenz he, Liuzseiq aeu vaizdiet rag ci duhdoem ndeu dauq daengz ndaw mbanj, de baez raen Augit couh dingz ci roengzdaeuj heuh Augit aeu duhdoem. De angq naeuz: “Augit, gig docih mwngz! Geij bi gonq, gyoengq geizyinx neix baez ndaejhoengq mbouj miz maz guh, couh bae caegmiuz, ciemz duhdoem, euj haeuxyangz, saz duhheu, coemh maenz yiuz…… Gomiuz ndaw



Dahsau riu lumj va hai.

mbanj mbouj rox saet bae geijlai bw. Bineix, gyoengqde ndaejhoengq couh ngeix dwkgeiz dwkgiuz, doenghgo ndaw mbanj mbouj raen saet di ndeu, gyaeujreih sing ndaq hix mbouj dingqnyi lo.” Augit riu naeuz: “Neix couhdwg gou vihmaz iu Ahnez guh daizgeiz bw. Docih mwngz, gou mbouj aeu duhdoem mwngz. Gou bae iu Ahnez gyoengqde dwkgeiz gonq.” Gangj sat, song boux de riugwkgwk hwnjdaeuj.